



15. juuni 2024

UKA2024/imm. 76

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Peqatigiiffiit kattuffiillu suugaluartulluunniit, nammineq kajumissutsimik ingerlanneqartuni aningaasanik katersuiniarneranni nipilersortartunik Namminersorlutik Oqartussaniit tapiiffigineqarlutik tikisitsisinnaaneratt pillugu Naalakkersuisut piareersaateqaqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Doris Jakobsen Jensen, Siumut)

#### **Tungavilersuut:**

Ukiut siuliini Inatsisartuni aaliangerneqarpoq, timersortartut peqatigiiffii imaluunniit kattuffii aqqissuussinermut atatillugu, Namminersorlutik Oqartussanit tapiissuteqarnikkut nipilersortartunik tikisitsisinnaalissasut. Tamanna periarfissaq pitsaasuvoq, aningaasanik annertuunik katersuiniarnermi tapertaalluartaasamat.

Ullumikkut peqatigiiffiit kattuffiillu amerlasuut bingortitsinikkut imaluunniit allatigut aqqissuussinikkut tapiisussarsiornikkullu aningaasanik katersuiniartarput. Peqatigiiffiit kattuffiillu tamakku timersornermik imaluunniit timersornerunngikkaluartumik sammivilimmik suliaqarneranni annertuumik meeqqanut, inuusuttunut, inersimasunut utoqqarnullumi pinaveersaartitsinermut siuarsaaqataasarput.

Taamaattumik isumaqarpunga taamatut tapiiffigineqarnikkut nipilersortartunik tikisitsisinnaaneq timersoqatigiiffinnut kisimi atuutiinnarani peqatigiiffinnut imaluunniit kattuffinnut allamut sammivilinnut aamma periarfissaasariaqartoq. Assersuutigalugumi meeqqat inuusuttullu suliniaqatigiiffii, piorsarsimassutsikkut suliaqartut, utoqqaat peqatigiiffii, innarluutillit il. II. qinnuteqarsinnaalernerannik tamanna kinguneqartussaavoq, peqatigiiffinnut kisimi iluaqutaaginnarani nipilersortartunullu aamma iluaqutaassalluni.

Qulaani tungavilersuutikka innersuussutigalugit siunnersuutigaara peqatigiiffiit kattuffiillu timersornermik ingerlataqanngitsut ilanngullugit tapiiffigineqarlutik nipilersortartunik tikisitsisinnaanerannik periarfissaqalernissaat Naalakkersuisunit aqqutissiuunneqassasoq.



**Pisortanut aningaasatigut allaffissornikkullu kingunerisassai:**

Naatsorsuutigineqarpoq aningaasartuutit pisortat ingerlatsinerminnut atugassareriigaat aallaavigalugit suliassaq naammassineqarsinnaassasoq.

**Namminersortunut aningaasaatigut allaffissornikkullu kingunerisassai:**

Suliap ingerlanneqarnerani namminersortunut aningaasatigut kinguneqassanngilaq.

**Innuttaasunut aningaasatigut allaffissornikkullu kingunerisassai:**

Suliap ingerlanneqarnerani innuttaasunut aningaasatigut kinguneqassanngilaq.